



康對山先生集卷之四十一

墓志

明故封文林郎雲南道監察御史儒學訓導楊公墓志銘

公諱舟字濟川別號訥菴家世武功人也曾祖禮國初舉人才引疾不就祖安父鑑俱孝弟力田為鄉善人鑑生四子長善次鼎次哲季公為縣學生讀書不成父命公繼哲為學生治朱氏易籍然有名於時成化丁酉鄉試已中式錄其文矣有某叅議欲私其門客乃牴落公卷此後累試皆弗售士論惜焉弘治

庚戌應貢上禮部拜夏縣儒學訓導勤以教人禮以自御夏人至今猶誦說不忘云九載滿年尚未及六旬且將陟官也乃幡然告歸家無厚蓄守薄田數十畝其心休休若將終身焉此可以占識公志矣正德辛未長子秉中第進士為行人又三年為御史

勅封公為文林郎雲南道監察御史配張氏封為太孺人太孺人鄉善人貴女也年二十歸於公善執婦道勤儉備至故能相成公學公已有官乃彌喜紡織所衣裙布敝猶不易曰我性蓋如是正德辛巳十一月八日公以疾卒於家繇生正統庚申三月二日春

秋蓋八十有二葬後四年嘉靖丙戌六月二日孺人亦卒繇生正統壬戌六月二十八日春秋蓋八十有五今年戊子九月三日秉中將奉孺人之柩啓壙附葬於公以狀授海請以銘公之墓海自兒童時嘗從鄉先生之後私識公之行事公天性孝友加以稟賦謹厚終其身鄉黨宗族咸無間言兩兄繼歿撫其遺孤無異所出堂叔某死無後葬之以禮又為主時祀於家秉中既貴祿之所入計已饒裕公歆然如布衣時顧自處益儉每飲食至輒以先公先夫人逝不及養感泣不已此亦可以謂有終身之慕矣張孺人性

尤儉素遺訓甚多秉中嘗述以告予曰不肖為御史曾拜吾母於堂記吾母之言曰我在家時聞人說而祖善而父將來必做官人我歸而父見而祖接人若恐傷乃而父果做官爾官視而父又加顯矣此而父之善所致也而謹識之凡百勿顧日前當從後看可也不肖携家口北上五口母告吾妻曰我平日過活甚難今老矣一薪一米未忍輕費世常說節儉勝求人諸婦宜深念此日用間以輩不愛惜累及吾兒請勿復來見我也此皆表表然可以訓及將來比跡古之賢母者噫嘻盛哉公與孺人生男子二人秉中允中

秉中以御史陞山西按察司副使允中受義民爵女子一人適里人党厚孫男子八人繆早夭余三尚幼秉中出也純紀俱縣學生而紀夭餘二幼允中出也孫女子三人秉中所出二一適重慶檢校王堂一許聘景塾允中所出一適馬河龍俱先歿純出曾孫女子一人已許聘馬氏苗裔盛矣方公卒時秉中以巡按四川過家孺人卒時秉中已陞官山西歸省問疾侍藥屬壙視窆曾無一之不逮所謂不期然而然者非公與孺人陰德宿厚詎有此哉銘曰武功之南厥川惟膺土厚水深公墳俱俱孺人是同奠茲終古

名德在時懿訓如睹子孫振振克遵伊武伊武孔賢
帝命是延豐章蔚誦胥貴公阡南山峩峩漆水湔湔
永言孝思尚慎諦旃

登仕佐郎鴻臚寺序班閻公孺人趙氏合葬墓

志銘

閻故為興平馬嵬人由警菴先生宅長安其子孫皆
居長安故遂以趙孺人葬長安南新醮之原而遷序
班公之柩合焉於是子翰暨溥來武功以銘屬海夫
序班公者海姑表諸父也與趙孺人俱有厚志瑰行
當不可毋砥於來世故予得述而銘之云序班公諱璘

字尚溫狀云上世萬年人蓋唐右相閻立本之後也
立本始葬馬嵬原而子孫因家馬嵬元季避兵入蜀
洪武初四世祖名昌復歸馬嵬而馬嵬之閭延蔓不
可勝紀矣名昌生遵道遵道生秉直秉直生通奇偉
有異識鄉人賢之舉人材除南京刑部司獄娶張氏
早歿繼又娶張氏生子鐸天順成化間詩人世呼為
警菴先生舉景泰辛未進士累官至浙江右布政使
娶予曾太父太常公之女累封至淑人生男子三人
序班公蓋仲子也修軀丹頰人望之如瑩玉又性敏
善記兒時隨所口授書即過耳不忘先君子平陽公

嘗言警菴先生與余愍肅公飲序班公僅五六歲愍肅公指席上食蟬請曰八條螳螂腿即應之曰五色鳳凰毛其敏捷精巧如此是時警菴尚在即署一時縉紳大夫聞者罔不竒之弱冠從警菴遊四方蓋多規識前言徃行收書肄學無所不博雖一器一物之小皆能察認世代人品萬不一失然多病不能奔走而性又喜逸遂故卒不有科第成化丁亥以警菴順天尹蔭當補國子生時周文公為祭酒深所器重每召語輒至夜分始退弘治辛亥除為鴻臚寺序班苦以不得省侍警菴為恨遂耿耿有心疾序班事不理

一二獨伏枕牀膺曰父老父老甲寅四月辛巳病劇不起年終四十又五也孺人趙氏通政趙伯顥先生女也世為北京大興人伯顥以乙丑進士起家娶宜人潘氏生孺人端莊貞淑有古女士之風襁褓時太學生高公見之曰此女不為貴人婦當為貴人母然貴家大族求者不可勝紀而通政公顧獨喜序班蓋警菴與通政皆詩社密契友而序班公每宴輒侍姑公熟見其美乃如此孺人自歸序班公則克諧孝焉康淑人極嚴肅也能獨得其懽心由序班公卒至今二十年辛苦備嘗操履無間教導諸子皆克自成立

為聞人而女子悉歸士大夫婦人之事可謂慊然無憾者矣正德癸酉三月丙戌以疾卒年蓋六十二矣生男子四人瀚滄浙溥瀚初娶种氏大竹令山女繼娶趙氏兗州知府蘭女滄先死娶趙氏樂至簿圮女浙娶薛氏洧川簿旺女溥正德丁卯舉人娶王氏故兵部尚書河州公孫僉事經女女子四人長嫁兵部尚書李公之孫順義學生桂次嫁翰林院修撰滕霄又次嫁王應麟又次嫁蕭奇元皆舉人也孫男子八人梅梧椿果校樓榭榭孫女二人俱幼在室夫序班公天性篤孝舉不忍忘其親及仕有官職猶思慕

以死此其志愍然世未之能有也人恒言公遇異僧善黃白得其術亦卒以不用又秦簡王嘗大陳古今名帖圖畫徵序班公徧視之至則掩其題識問為何人歷千萬軸無一不當王因陳然敬重矣其隱行遺致皆載在閻氏家傳中可備頌說今得而畧云序班公生景泰庚午正月壬申趙孺人生景泰壬申九月庚寅其合葬也以正德甲戌二月己未銘曰維閻之先有令德窪窪四世光乃則無言弗訓誰可測三秦之文畢其力公為之嗣往安畫斯道不延年壽隔子孫繩繩奕且赫斗城之南定幽宅淑音烜儀此焉

堂山集卷之五
格鬼伯罔怒神永懌正月壬午我銘石仲春日日工
有翼

懷遠將軍西安右護衛指揮使陳公淑人曹氏
合葬墓志銘

予為諸生時邃菴先生提學關內以予就業正學書
院當時交與之士其最厚者曰陳裕後光祖予既忝
竊第而裕後亦就襲替為右護衛指揮使矣裕後博
學能文累不第場屋故往就此者謂非數邪或曰其
父平林公之命也予以與裕後友也故往來西安則
數拜平林公今年九月廿日裕後以衰經來執吾友劉士

奇員外狀請曰先人以四月二十六日弃不肖光祖
將以某月日葬木塔里先塋與淑人合兆必吾子有
以銘其墓石使後世可以考先人之遺行茲惟光祖
之友也予惟平林公盛德偉容宜有壽考乃果如此
蓋其生正統壬戌三月一日至是則八十歲五福克
備名德不衰可與膚淺者道邪按狀公故順義人始
祖曰德元生五公五公生勝元未避兵野城而依舒
城孔氏孔氏為湯元帥部兵孔氏沒勝遂代孔氏為
帥帥兵修軀偉貌勇略絕人常有大志值高皇帝
兵至河北於是仗劍歸之有功授千戶又從攻東阿

東平汶上皆連破之明年戰于齊眉山並子賢死於是贈明威將軍指揮僉事而以子賦為薊州衛指揮同知尋改西安前衛在西安能其官陞陝西都指揮僉事此平林公父也平林公諱銘字德新天性孝友母淑人高氏早卒至今思慕不忘生日則謝客茹素哀慟有加都僉公母以被命來陝事出倉卒不能遷葬其母語及輒慟時平林公方少弱冠也解之曰夫勞於國者不得私於家臣子之節無兩立也大人不能遷太夫人茲惟小子之責請終身不敢忘大人之所憂於是身自往董之數月而反葬焉其已異矣都

僉既卒平林公襲其官則益修都僉公之業德聞興焉靈州缺守將當塗者以平林公往平林公故善射靈州諸將盛致緡錢為注欲與平林公校射凡數回諸將悉莫之勝平林公乃悉得諸將緡錢無算諸將於是避匿平林公不敢言射矣平林公乃與諸將約曰能射勝者以吾所有緡錢厚賞之軍士乃各相砥礪挽強善射虜用憚焉未幾以王親調衛真定 秦惠上奏留右護衛尋陞指揮使 惠王薨 簡王立益敬重公嘗問平林公曰居官亦罔利乎公對曰有之但未敢屈法官人爾王善其對既而曰若豈敢罔利

者也御史李伯起按關中文武之吏莫敢正目獨平林公數見親信令訊疑獄則應機而決亡弗當盜李衡嘯聚山谷時以為憂御史以公往得其覘盡釋其餘黨同事者或疑之平林公曰直當如是爾事上御史異焉以為長者也衛有屯賦平林公俱與為期約而不恃法衛人感之其課反最於他衛及其老而致去衛人無大小皆泣留於王平林公乃辭去益懇於是王卒從平林公而命有司歲給廩役終身焉淑人費氏都指揮費公從孫也父曰銳為義官淑人天性柔惠貞靜八九歲即容止有常度及長益閑內則為

父母所鍾愛年十七歸平林公宜其家平林公有側室三人淑人待之甚厚所生子女無異已出及生裕後教之曰予聞世祿者侈肉食者鄙汝當讀書為聞人官蔭未可恃也生正統甲子十一月十五日以弘治庚申二月二十五病癱卒年五十又七矣側室高氏生子二人清源皆義官周氏生子一人濟張氏生女一人嫁劉千戶子大明孫男子十一人大策西安府學生乙卯武試第一與大壽皆光祖子大猷清子大忠大仁大義大禮大智大信源子大誥大詔濟子而又有孫女子九人二出光祖三出清二出源二出濟

則平林公之苗裔可謂盛矣於是為之銘曰位崇齒
穹後廣德豐有閔此宮茲惟元終

王安人魏氏墓志銘

安人者瀘州學生魏鑿女也姿度婉淑動止莊謹十
歲值魏君卒與母高氏居無肯一失其意族中人人
竒之曰兒他日必為良人婦年十八歸陝西按察司
僉事王君姑劉氏者王君嫡母也王君生母亦為劉
氏皆以先人耀州學正贈主事公卒寡居干家而安
人事之曲盡其孝二夫人咸宜焉次劉夫人既有疾
能朝夕侍奉母急色及其卒也勉匍匐以至成葬哀

慕毀痛至終喪未嘗少衰方王君為學生時家故儒
門清簡無厚貲也安人能一切伸縮綜理使君得甘
心向學後君以戊午舉鄉試乙未壬戌兩舉禮部不
第因留滯京師者五年母劉夫人之養皆安人率第
愈極力而為之君既舉乙丑進士方欲圖省母君西
還得蘭州差若頗便矣而母君抱疾甚篤安人事事
無所不盡然乃竟不起於是母君夫人遺言君曰此
孝婦兒歸宜愛之重之婦德與孝可使人人取法也
君初仕宦安人偕居京師雖已貴有奉侍猶蔬食布
衣無異儒生時有詰之者安人曰我儒家女所性只

欲如此爾一日君自部署還言及刑法之至某以某事合死或嘆息不安安人曰豈非欲求生道不得邪夫君為刑官民命所係苟果極寬當盡心以求其生即緣以受謫何害故君在刑部有美名令譽雖君天資夔特要之安人所助不少正德己巳冬十月安人忽有疾中子于宣刲股肉以進尋少愈矣明年庚午四月則病復大作以其月二十四日遂卒年才三十九爾生男子三人于蕃取朱氏僉事謙女孫也于宣聘閔氏舉人徹孫也皆向學克進取于旬且幼女子一人許聘知府李復貞孫孚交某年月日將葬安人

州北會龍山祖塋之側王君以舉人陳倉程勉學來請銘夫婦人之性剛者或多悍柔者或多委至於井然能以家事為理上不失舅姑之孝中克承意君子而下逮僮僕罔有不善雖載紀所稱何加若王安人蓋表表者也嘗聞王君言安人處妯娌及內外妯娌無所獲戾至僕婢之際雖甚嚴毅而憐恤之際獨厚予向因家事怒諸婢將責矣安人因和色默諫曰彼惟愚方為君役彼能一如君意日將後君矣君安能役彼邪此意甚到可以語諸有位者毋以過望責人中庸曰君子以人治人改而止此豈其遺意乎銘

曰婉能順婦禮以盡雖不享其厚而子之孝視已以
害愠龍山蔭蔭其歛且豐即未大其寵而蜀之人曷
不知為賢安人魏氏之官

明故文林郎監察御史王公合葬墓志銘

公諱英字文英家世扶風天杜人也高祖某曾祖某
祖某父林俱隱德不仕而家善富厚有貲蓄粟至萬
餘石凡遠邇借貸輒以半息為准故人人稱公家為
義王家云公生承家世饒裕益又長厚有量甲辰歲
關內大饑至人相食公視左右氓曰此皆吾故能養
者今若此吾弗與為之彼將安望於是出粟五千石

盡散予之約曰歲豐則償歲歉則已後歲豐矣計後
業者十一二乃嘆曰嗟乎昔吾以粟與諸君謂可生
活相聚今既不能全其來乃幸有諸君在願棄素約
勿較於是諸存者咸感激曰吾輩無以報公願公世
有貴子弟後公子綸以鄉試舉人由真定知縣陟監
察御史巡按四川有顯名於時陞嘉興知府而公與
配孫氏繼室史氏皆被有封贈之命此非其真報與
公叔父政嘗為某地某官隸有盜庫者則反揚言為
官公詣城隍廟禱曰官即不能奉遵教法乃何至為
盜神血食茲土獨不能陰監耶是夜與政各夢老人

語盜形狀甚合明日果獲盜此蓋其誠恕所感云孫孺人生男子四人綸緒紀而某早死女子一人嫁某姓孫男子五人孫女子三人孫孺人慈惠克相於公史繼之又克似其德因公刑諸內者有禮道耳公卒於弘治庚戌五月十三年止四十又九孫孺人卒成化癸卯正月二十七日年四十又一史孺人卒正德甲戌十二月二十四日年四十又一明年乙亥十二月十八合葬天杜南新塋知府君以平山令趙宏卿狀來請銘予曩在官秩與知府往來獨厚誼既不可辭天祗去武功近數十里聲語相聞知公行誼尤切然

嘗恨公忠厚敦實如彼而壽但止是以為非天所以鑒右良善然視其子孫又彬彬然盛遠此又若補其所未足豈其數之一定雖天不可易與銘曰 德不能壽享已克厚孫子綿懋天豈無右求茲焉咎

嘉議大夫刑部右侍郎郝公墓志銘

公諱志義字宜之世為延安清澗人自祖以上俱不仕父安始讀書舉鄉試後為萊州府通判有惠政萊人至今誦愛之娶夫人楊氏生公自幼靈異能旁識十歲萊州公教之書皆浸浸會大意也後教之朱氏詩傳遂中成化戊子鄉試明年己丑又遂第進士明

年庚寅授為大理右評事受

命審錄河南罪人河南郡縣時且大旱矣公至折死
罪成案三十五人釋拘繫三百七十人決有恃冒展
轉十人即大雨有年公由是名聞公卿矣三年陞山
西按察司僉事山西多獄訟乃悉置無事實取擇兇
盜無狀者嚴治之民盡畏憚之矣僉事三年陞副使
一年坐事謫福建都轉運監使司同知同知二年弘
治戊申復為山東按察司副使後四年母夫人卒去
官歲乙卯復除山東山東三年陞四川按察使盡以
所治山西者治其吏民皆按堵矣四川三年陞山西

布政使司右布政使尋陞山東左布政使未幾通
公卒巡撫都御史徐公知公貧莫可計大事也以
金賻之不受四年乙丑改四川左布政使尋陞都察
院右副都御史巡撫湖廣等處湖廣民貧察吏多黥
慧無狀公曰吾不可為有司之事也下令郡縣有吏
能慈惠百姓者巡守官以實事白迹其不法者罷黜
之湖廣父兄皆私自唁憫以為有父母育撫也時年
正德丙寅

上方圖用舊典刑部缺右侍郎公卿交議宜用公代
乃詔為刑部右侍郎將行以十月七日病不起湖

廣父兄子弟若喪考妣矣三司文武之吏莫不相望
痛悼矣夫公天性剛介歷官三十有八年終始亡有
撓焉雖甚顯大又僕實不華也踰三月子序始自故
鄉來扶柩歸且葬矣乃走京師以考功主事王納誨
狀請海銘以昭白公之先烈海舊遊公卿之間聞公
之風甚烈且公為先達所效慕也敢以辭耶公生正
統甲子某月日春秋六十又三矣初娶夫人白氏兩
淮都轉鹽運使行順女有德宜於公封孺人卒生男
子二人庠學文有行蚤死序既舉於鄉且履孝不悔
行當嗣公烈矣女子一人嫁為綏德衛千戶申鑑妻

繼娶夫人孫氏鴻臚少卿慶都鉞女德如曰夫人生
女子一人嫁考功已封為安人某月日甲子將葬公
石嘴原祖塋之域與白夫人合兆銘曰 顯顯我公
維秦之英維國之楨維民之刑弗展厥成悲此石銘
明故封中憲大夫彰德府知府劉公墓志銘

公諱景字時華中部人也其上世祖仕元為萬戶譜
亡其名生七子曰劉澤者萬戶第四子也生簡簡生
君傑君傑生處榮處榮生縣學生準準娶僉事折某
女生公公生三歲而亡父母拆改適他姓以公隨之
及公壯繼父亦死拆乃携公歸劉氏娶知縣高秉文

未幾為有司擇選為縣吏惴惴小心不敢少有所肆於是縣官器而愛之三考已乃拜保安州洗馬林倉大使繼而陞亳州義門巡檢巡檢三年值子達夫以進士為太平推官迎養來遂棄官居太平數月乃歸中部鄉人且以公身富子貴或有所更易炫耀而公惟以恬淡自居雖惡已者莫不起敬也後達夫陞彰德知府迎公與高夫人養知府邸中海時以得告送毋過鄴就以拜公頽然偉丈夫也其容質而肅其氣和而莊私謂必享高年膺福祉乃今一如所億長者之所履其容貌辭氣果足以逆見如是也後達夫以

御史奏有治狀

孝宗特錫誥命封公為知府而高為恭人公嘗謂達夫曰吾以微賤賴汝至此吾老且斃亦無以報稱德意惟爾謹官審度捐軀竭力耳天性孝友凡所能致者無不盡心力為之其葬母與兄事具載劉氏家乘中雖頗於典禮未合而惻怛慈愛之意足以通天地曾鬼神無遺憾者矣達夫言公在義門時得小盜數人兵吏以為喜公曰此貧窘所至可舍之吾所求者大盜橫賊也後果有大盜劫人或曰盜勢盛不可易敵公奮然先登曰不得此吾不可一日居義門已

而群盜悉獲於是義門三年卒無盜矣生有三男子
 一女子皆出自高恭人三男子者玫琤璋也玫早歿
 琤即達夫丁未進士累官至都察院左僉都御史巡
 撫順天薊州等處稱有良治璋順天舉人女子適鄜
 州王舉孫男子十二人伸縣學生儀偉監生玫子也
 佐辛未進士戶部主事卒儼監生侃舉人倌縣學生
 仁舉人達夫子也仕舉人价倬儒璋子也孫女子八
 人已嫁者三人聘者三人其二尚幼也又有曾孫男
 十二人曾孫女七人嗚呼盛矣正德丙子二月八日
 公卒於家遡其生宣德戊申四月六日壽蓋八十又
 九達夫將以十二月十五葬公鏃子坪之陽與高
 人合兆以予嘗與銘高恭人之兆也至是復以公
 屬予予於達夫有兄弟之義則公銘宜不可辭銘曰
 德厚享延孫子允繁昌宗允先惟關中之艱冢土有
 塋胡不萬年

奉直大夫通州知州張君墓志銘

君諱舜舉字邦獻別號東崖子家世武功人勝國時
 代有令人曾祖輻生顯宗讀書不仕為縣啓蒙師予
 猶記其教法嚴肅為近所未覩也生番為鄉飲賓以
 君貴贈承德郎配鄭氏榆社丞莊女也亦以君貴贈

安人生君與其弟舜賢君天性穎悟不凡長為縣學生科目文字所出必異先君子特愛敬之後果為遠庵虎谷時敏所重弘治甲子中鄉試高等以乙榜拜太原縣學教諭教人有法諸生畏焉丁卯應聘為順天同考最號得人巳而有鄭安人喪服除復麻城士大夫見其教法甚禮重君庚午復應聘為四川主考所收皆名士尋陞儀封知縣政通人和蔚為中州守令之望撫按以才堪於繁奏調內鄉聲稱日隆吏民益協薦論之疏後先相踵未幾封君卒以憂歸起復吏部時大興缺令部尚書殊難其人點名及君曰

吾有良大興君處至繁之地若無事然京師人語

曰

天子愛民錫我良令大興廳事久廢壞至不能蔽風雨君請於上以官房為前後堂輪奐之美甲於畿內公卿具以其賢卓絕於時值通州缺守遂陞君知通州通州去京三十里東南要路也中多貴人宦官凡事相涉有貴人者請謁不獲遂以誣罷君君慨然求歸詩酒之遊里閭之樂凡七閱年其心陶然非區區以仕為臚者班也嘉靖庚寅三月丁巳病感寒不起由生成化丙戌月日春秋六十有五初娶徐氏卒無

子繼娶王氏壽官鉞女也俱封安人亦先君卒生三
男子長汝為季汝明皆縣學生仲汝翼服家人業一
女子嫁生員談文孫男子二善繼善性孫女子二幼
未許聘又繼娶馬氏清豐簿萬衢女汝為等將以是
年十二月庚申葬君於城北祖塋與徐王二安人合
兆狀來請銘予與君殊厚義不可辭因記君大興事
若審編之公惟醴泉解理常與君不避豪右毅然獨
行為民所悅服他無聞也其謙以居鄉庶以蒞職則
士大夫之艱節若君何忤哉銘曰
城北之阡廡廡
延延同責厥儷萬世是安子孫振振後不愧前詩書
之裔武功是瞻君才偉卓蔚惟時賢位不並德壽胡
亦然昭茲我銘倘為世傳

明故迪功郎承天府經歷周君墓志銘

君諱冕字時制鳳翔人也高祖大安曾祖濟祖楫父
恕皆隱德弗耀母劉氏生君一人補府學生正德庚
午奉例為國子生嘉靖丙戌除汝寧府經歷汝寧庫
盜失庫銀知府罪典者君曰盜庫者盜非典者也後
果獲盜知府以君為明令領巡捕事民得無冤豪強
有所怙恃者悉不敢縱已丑丁內艱壬辰復除承天
府經歷故安陸州也為

上潛邸

獻皇陵寢在焉送往迎來視他府特加繁劇君承知府之委處之裕如知府以私事屬君君曰殺人以媚人吾不能也於是與知府相左凡有難且疑者知府必以委君君立辦焉而當道嘉賞日至分巡副使鄭公又禮遇之贈之以詩知府卒不得志於君矣丙申十二月官滿將上考績十一日戊子疾卒由生成化壬寅九月四日己亥享年二十有五配張氏生男子二人長易戊子舉人次詩士少事於學女子四人全汝麟士員郭交劉交強容壻也孫男子三人有圭有人相

年丁酉九月二十七日癸卯將葬城東審平莊先塋之次易持吾友立庵先生狀來請銘君之墓石按狀君瑰偉激昂以氣自負里中賢豪莫不樂交於君人有過輒面數之已而相與如常人愈益感君嘗讀項羽傳至烏江不度曰丈夫之志也可以識君矣君有伯母侯氏寡而無子君養生送死曲盡其道又有鰥舅寡姨皆無肯令失所孝友之性顧如此世之媿媿僕邀馳驟功名者視君何如也立庵宿無妄語其稱君殆不容口益可以知君矣易之所就當不可量天道果無知耶銘曰鳳翔之區古雍州靈勝所萃賢

俊稠周君磊落人罕儔科場失俊中詎憂靖恭爾位
將焉求直道不田惟所投敦義篤孝思悠悠視彼僕
邀君獨羞佳兒英英實啓周君之潛德永弗休
龍章迤邐光爾丘

中順大夫知岳州府劉君墓志銘

君諱煥字堯章真定藁城人也高祖諱聚生迪功郎
大寧縣丞聰聰生清清生某登辛丑進士仕為浙川
知縣娶侯氏生君與其弟某皆讀書善文弘治壬子
君舉鄉試第七人明年遂第進士又明年授戶部陝
西清吏司主事管太倉出納人咸稱宜焉太倉滿又

出權蘇州商稅蘇州商市多權貴來行商商者多附
綴挾重貨也君至稍稍出約束下權貴者皆避去
商者又人人得平故官稅亡弗及焉丁巳母太安人
卒至庚申免喪明年復為陝西清吏司主事侯夫人
為太安人復出權稅臨清臨清之事視蘇州益嚴其
商市者益寬也壬戌陞本司員外郎一年遂陞知岳
州府制京官五品非三年上者不得出治郡兵部尚
書劉公力以薦君故君往焉比至岳果事事整齊為
之向所糾結弗列與僊廢弗新者皆判然舉矣於乎
其可謂循良已矣正德丁卯岳政成來吏部考功至

臨清病瘳至京瘳大作歿矣初岳人來吾嘗問君岳人皆爭述君善郡也吾謂君如古良郡者矣曷乃有爾也君生成化戊子七月甲戌年纔四十耳其所享又何弗引也於乎異哉君娶張氏有女德宜君封安人生子一曰堪女一曰某皆幼也明年戊辰月日將葬城西武家庄西原先兆安人之兄藁城學生張君持狀來謂君與吾善也宜吾銘君銘曰明之弗光也享之弗長也嗟乎君之亡也

明故承事郎輝縣知縣李君墓志銘

君諱傑字民望上世馮翊人也始祖仁卿避亂居華

子孫世為華州人仁卿生剛剛生清清生讓早孤依繼母秦氏及長秦氏喪明事之曲盡孝道以勤儉起家人至今稱孝友云娶王氏知真定縣王公徽女也生君少穎拔有志故兵科給事中東公見而奇之因以女許妻君及長為州學生綽有譽聞中正德丁卯鄉試累試禮部不售值玉孺人年高乃慨然嘆息曰嗟乎古人一日之養不以三公易親老矣何必第進士然後官也乃出為汜水知縣有善政良法民吏皆敬憚之未幾玉孺人卒以憂歸華哭泣之哀顏色之戚蓋近所未有也洎滿喪乃悉取守令行事著於編

允十餘卷曰不知此則不可以盡當官之責復除知
 輝縣敦禮崇義平訟均賦民有賴焉暇則舉廢墜表
 往迹百泉書院及蘇門嘯臺皆輯而制之居常以禮
 自守一介非禮弗為也見上官恭而不隨或有過諂
 者則赧然羞道之曰是過於夏畦也夫辱身而賈名
 趨利而毀節即榮名厚利夫夫弗為也居輝二年卒
 於官貧不能歸州嘉靖癸未三月朔旦也距其生成
 化丁酉十月十三日春秋四十有七無子有女三人
 其二東孺人所生其一出側室賈氏豈數命相乘有
 適然耶抑天道果無知而使善人志士如此耶甲申

七月十日將葬君於華麓先坐予以事來入華孺人
 弟舉人希大洎其伯兄希仁持伯弟監察御史希宋
 狀來請予為銘予昔往來華郡數與民望交知其為
 人直諒有道實器重之乃何以無銘於君之墓石狀
 稱君趨向高尚宵次磊落常扁座右以為天下第一
 等人行天下第一等事自期閉門讀書屏絕人事耻
 安小成罔趨近利於乎其亦偉男子哉方希宋巡按
 歸有左遷之報君乃謂希宋曰子豈若祿仕者耶反
 覆數十言載在行狀中故希宋歸志益堅更無可回
 者豈非超然有見者耶銘曰 華山之麓其墳穹然

是惟君宅行義不爽俾艱厥嗣天亦允惑子德孔莊
子行弗長子名則揚視履罔斁天乎何忌永茲千世

對山集卷之四十一

康對山先生集卷之四十二

墓志

昭信校尉太原右衛百戶霍君墓志銘

君諱 字 上世山東新城人以從軍太原遂家

山西焉至君父勝以總旗從征有窄溝功授本所署
百戶配安人某氏生君及弟昂君負氣磊落天性惡
諂佞而尊事直方善談時事精騎射數為遊兵前鋒
叅將姚君信都指揮高君登盧君卿皆相繼委任或
延為幕賓咨議邊務先時偏頭關迤北羅圈堡濱河
每冰合則虜寇先至當道命盧君設守以君贊畫之

力虜十年不復窺堡坐是預選軍政令兼十百戶印
十百戶人人愛戴謂有倚賴老瑩堡在北邊有兵馬
錢穀獄訟之事號繁劇難治以君宿有風力特選任
之不一一年上下稱善矣有將官家奴自開堡倉出豆
百餘石監收以下莫敢言君執縛其人返豆于倉移
文撫按正奴罪而劾主將堡中小大莫敢易命一日
虜自鎮西入寇其鋒甚銳君率仲子鳳與數騎追斬
驍虜一人總兵者奪與所私君曰吾父子躬冒矢石
得虜首乃為執力所奪吾雖不得此天當別有報吾
者不數年季子鵬第進士此非天為之報邪由是稱

病還太原優游田里若將終身焉及鵬知咸寧君兩
至矚其行事曰居官能若此可謂不負所志矣遂決
意東歸比歸值坊門落成知太原黃君就第加賀仍
題坊曰文武濟美時君已嬰疾與盡歡而罷曰吾年
六十子具成立死復何憾是年戊子六月二十九日
果不起訃至鵬持知長安李君伯音之狀因表第刑
部主事閻公甫請予銘君墓石狀言君先娶安人劉
氏生三子長鸞襲百戶次鳳理家人業又次鵬壬午
舉人丙戌進士今知咸寧清才駿譽將來未可量也
劉卒繼娶何氏未逾年又卒再娶司氏生二子鷗鶚

尚幼女子三長適百戶襲子顧天民二尚幼居室孫子四人州川岱岳生成化己丑二月九日至是年六十雖不期頤已及下壽嗣續之繁文武之胄赫然名于山西君之福履可謂厚矣予往華山過長安咸寧君數就問予以是知君之家訓賢于齊人多也義不可辭銘曰太原城北澗河原其高穹穹晉所瞻君與安人合葬焉子孫蟄蟄碩且繁文武衣冠為世傳繫君之祀宜萬年我銘在壙何可湮逝德耀功惟後賢

射洪縣儒學教諭泔阿文先生墓志銘

先生諱清字潔之醴泉人也勤學好古一時英雋之

士皆莫能及累試不售歲貢上禮部得請除綿州訓導循循善教士子感焉乃後擢射洪教諭至則以所以教綿者教射洪皆颯颯乎有蘇湖之風值藍鄙之亂蜀方不寧先生在綿保障之功至今人誦之其文武之略可以槩見矣歸田十餘年非禮不動迪德益弘乃以癸巳六月不起享年幾十有幾八月戊子將葬先生于新兆其第四子舉人藻以進士張君狀來請銘其墓予聞先生名義方正光大心實慕之後于乾州會諸公言藻之文采過人私以為必文先生子也乃今見藻因足以知先生之懿德當不朽于世其

焚券罷償諸事鄉人仗義者亦能之而况先生哉其
事繼母救群弟皆輯變以常蓋大君子之難事於乎
此先生之所以為先生也士大夫尊而信之鄉人誦
而法之不亦宜哉卒時風雷之變酷暑若無天之于
善人蓋若是益可以觀德矣先生初娶楊氏生子質
直采繼王氏生子藻英蔚蓋六子云女子四人皆歸
名族良士孫男子七人宗堯宗湯宗舜宗禹宗正宗
理宗義而又有孫女子九人焉其胤昌矣為之銘曰
位弗滿德顯厥後巖巖科名子奄售九峻之下土維
厚君斯藏之福如轉子孫振振賢且懋世萬不數名

宇宙先生之德胡不壽

庚午解元吉原靜墓志銘

原靜諱體仁姓吉氏馬嵬世家也高祖某曾祖某祖
贊父友文皆世有懿德富而好禮馬嵬人重之友文
娶張氏生原靜幼敏悟不凡讀書輒旁求指趣作為文
辭豐贍有氣識者恒以魁解許之從谿田先生治春
秋隨試庚午果中鄉試第一主司以為稱任累試禮
部不第益更自勵以求必舉及乙未又不第原靜曰
吾倦矣予黃山之下有泉可濯有田可耕安能後後
自苦盍歸乎來課子葺藥以終天年比歸寢疾十餘

日而卒臨卒索紙筆書七言律一首投筆而絕英邁
之氣超捷之才不以將死少餒非養之有素能若是
邪於戲可惜也已由生成化甲辰十月三日丁巳至
嘉靖乙未四月二十四日甲寅享年蓋五十有二於
乎原靜事親孝教子嚴內外有則舉措率禮予殊佳
其為人方謂可以大受乃至如此斯非數邪配劉氏
興平名家女生男子五人長來逢守家人業次來獻
來朝皆廩膳生次來旬方進未艾女子四人長許聘
予姪餘幼其一則側室某氏所出孫男子二人曰順
曰換梁孫女子三人俱幼是年七月二日辛酉將葬

原靜于北原新兆來朝來以予銘其墓石銘曰英邁
之氣琦瑰之才位既不逮命復罹災於天謂何胡寧
弗哀美名雋操終古是瓌從以令子胡德之衰北原
窈窕永奠玄臺刻石啓後用覲厥來

李君宗之配毛氏合葬墓志銘

君諱儒字宗之其先洛陽人也七世祖某挈家避兵
入關中占藉鳳翔德化里求樂中以戶口不及改寶
昌里今世為鳳翔寶昌里人四世祖希道仕為黃岡
丞生子原為君曾祖原生子鐸為君鐸娶李氏生子
廷用為君父廷用娶崔氏舉人敏之次女乃生君祖

鐸殊愛君嘗曰此兒質甚美當從事于學因命曰儒
即能敬受祖訓黽勉淬礪讀大學論語通大義矣遭
父喪而祖老母寡弟幼口食所仰不欲重煩大人乃
請循父業祖泣而勉從之由是生意日懋矣配毛氏
處士亮之女也有婦德事姑殊孝事事宜于君故君
承業數年祖不知其無子母不知其無夫弟不知其
失怙亦毛有以相之也後祖以壽終君居喪一無違
禮又數年君挾貲往荆襄母崔氏病作毛請醫禱天
無有弗至凡數月未嘗頃刻離左右及卒衣衾棺歛
躬自料理人以為難能君聞訃哀毀成疾毛遣其子

涵往迎之歸疾已篤毛禱天乞以身代乃竟不起臨
終謂毛曰吾生不能侍母抱恨終身幸此兒在可善
教之以若吾祖之志君卒後十有二年涵果舉鄉試
高等初仕為高唐知州撫按以其有善政交薦于朝
陞河南同知時毛皆在迎養孝姑之報天道昭然安
可誣也癸巳秋九月五日毛寢疾不起由生天順己
卯二月五日享年七十又五君生景泰乙亥十一月
五日卒弘治乙丑二月十五享年五十又一又明年
乙未月日涵將合葬栢林凹新塋以予銘其墓石夫
毛之孝道姆儀皆可誦說而涵之居官守身表然在

人將來所就其封錫之命優渥未已不但近日應詔
一時而已涵雖一人又有四男子占杏召啓雖俱幼
其進莫量與二女子厥胄昌矣銘曰維孝動天維德
啓後嗟嗟李君履罔或謬郭南之阡與媿同竇孝道
母儀千古如晝孫子翩翩實發實秀縣縣翼翼王蘇
是壽我銘弗謏後人其究

處士張公墓志銘

處士諱璠字廷玉世武功人也曾祖大父羽舉鄉試
高等仕為山西文水知縣配康氏生輻隱德不仕配
馬氏生顯宗讀書不仕鄉人延為弟子啓蒙師嚴毅

善教其子弟皆循循有法而後繼以為教者萬萬莫
能及也配馬氏生處士幼而尚好義氣而天性率直
自便鄉人無小大皆愛重之喜飲酒行樂無所量際
遇賓客或所私重則傾倒盡罪懈其胸次豪縱蓋大抵
類是云正德丁丑八月庚戌以病痢卒於家由生正
統癸亥五月乙丑春秋七十又五娶鄭氏榆社縣丞
鄭公莊女也貞淑宜於處士年若干早卒生男子二
人長舜舉甲子舉人歷太原麻城教諭有文名兩聘
為順天四川同考官已而陞知儀封縣才廣效長撫
巡者以為不可處以小邑

堂山集卷之四十一
奏改知內鄉方駸駸向用而處士卒矣然後當致有
顯命於處士焉次舜賢孫男子三人汝為汝翼汝明
皆讀書脩學孫女子二人一嫁生員談文并汝為等
小節而大體嚴整平生與人無所私怨至於議論之
際則侃侃不假借或有相詰者則大笑以謝曰我性
蓋若是自舜舉連仕以至於今以予為故親且同里
閭也則日相款洽故知處士益詳其孫子盛衆有文
采宜矣明年二月日與鄭合葬縣北祖塋之次舜舉
以銘請予於是銘曰

郃城之北其土沃而厚其墳巍而瞻乃處士廷王之
阡孫子綿綿其後孔賢魂魄永安於保爾萬年

義官李公改葬墓志銘

君諱英字世傑其先平涼草峯里人也祖曰李三
國初時摘為西安後衛軍屯三原豆堡里子孫遂世
家豆堡云公父諱忠有器量不行心計勤儉自艾人
稱為長者配王氏生公頎體脩髯讀書習事綽然有
父風天順間從軍榆林虜大入寇嘗斬獲虜首為部
將所奪去公不能平以聞於

朝廷既而部將重賂證者則竟以功歸部將公曰吾

自盡心報國耳何屑屑與部將爭已而部將所得之級亦竟以訟削去時有王都督珎者甚壯其義氣焉成化己亥輸芻助邊為義官又三年甲辰關中大飢至人相食也有司以公忼慨有口勸公出粟賑飢者飢者得公粟則生活若干人也人稱公富而好禮勇而能忍交而不群其信然乎生永樂乙未七月三日卒成化丁未七月二十日春秋七十有三配陳氏處士伯通女也端莊有容恪守婦道事上逮下一中軌則子孫雖甚愛亦必嚴以教之曰不可使玩而難化也生永樂乙未十月十一日卒弘治戊申七月二十

八日春秋七十有四生男子三人璽聰明而明為國子監生女子四人邵能潘鉉趙景陽党鵬其壻也孫男子十有二人仁儒倫俊佐傳信傑偉借伸佖而伸舉壬戌進士知臨汾有善政陞山東道監察御史孫女子五人曾孫男子十有八人曾孫女子二十有二人玄孫女子一人弘治戊申己合葬某原先塋正德己巳十一月某日伸以母氏之喪歸三原會其父君重痛其兆噫隘臨阪非永久之道乃遷豆堡新塋西新塋兆中伸來武功以海銘公之墓海不敢辭銘曰有德有壽矣有子有孫以至於立矣賢而傳矣遷而

安矣何弗延矣

劉處士墓志銘

興平處士劉公以正德癸酉冬十一月九日卒於家
子成都府通判寶由成都來治葬縣南周村先茔以
明年甲戌冬十一月廿又二日葬公於此走使來武
功請為之銘按狀公諱江曾祖忠祖亥才父達成以
好義樂善稱於鄉間達配馮氏以正統壬戌十一月
五日生公天性篤孝馮氏早卒事父曲盡其孝出告
及面內外無間言嘗宿旅外舍見城中人必問見父
否否必求問見者見見者必求其衣冠動止或言其

衣冠整飭即喜或言其未飭即怵怵恐懼曰此必有
疾病雖夜必馳返至父所問慰乃已父每病左右就
養衣不解帶者累月及其卒哀毀至骨立資送一從
腆厚惟其所有亡肯留惜迄其終身蓋四十餘年追
慕迫切之至便爾泣然流涕有所飲食必嘆曰此不
得復奉吾親也見子孫成立者必嘆曰此吾親所不
及見也壽日子孫戚黨稱觴咸至必哭而却之曰吾
親安在吾可以受爾奉我也易簣之日遠近痛悼蓋
仁人孝子風聲所在自足以起發人心如此曩予為
諸生與通判君甚厚往來興平必就謁公公之溫然

和毅然敬心竊慕之顧其精神完粹體貌充發必可
百歲以視其子孫之榮養乃止如此雖已躋有嘉壽
然視履考祥猶所未足也配符氏生男子四人寶貴
資實女子三人王保子霄與學生王大叙壻也孫男
子五人某某孫女子一人幼未許聘銘曰
始平有古風是惟劉翁翁德克長惟劉之慶子孫綿
綿翁孝是延是延是似何不克世欲翁之思視此銘
辭銘辭不刊世萬孔安

咸寧李處士墓志銘

處士諱萱字廷芝咸寧人也其上世不可考自曾大

父忠始服賈著姓為關中所稱王子曰道安道安生
潔潔取賈氏生處士惟敦樸無華兒時則不妄笑語
人咸異焉稍長入鄉塾誦詩讀書方勃勃興也乃廢
為家人業則多所蓄積關中業家人者未能或之先
也一日翻然曰夫人貴知止有足富貴非可以必終
何日僕僕然母有已期也吾鄉人往由維揚起家者
至多然或多貧莫返者此奚不能恒富然逸而蕩蕩
則莫之據而貧其勢易反覆手也吾何若放情丘壑
與鄉人日聚會往來使不失吾田廬以覩示於子孫
哉於是出金於邊拜散官章服委蛇生老病死非問

里不遊也某年月日以疾終於家享年六十又五其生蓋景泰甲子也處士天性純孝事親曲盡愛敬飲食必親居鄉黨恭默謙厚不言人過所與遊必德似行同始相周旋咸寧人蓋故以長者目之云初娶董氏生一女子為張倫妻繼劉氏生一男子曰秩癸酉科舉人再繼董氏生二女子深州吏目管朴引禮舍人張子之壻也秩生男子二人企膺企同企膺已娶勾氏女俱讀書事學女子一入幼未字此非德厚效長者哉予往歲游華郡過長安見士大夫言徐伯瞻侍御令咸寧時適處士家當里甲伯瞻好

賢禮士則欲蠲處士家里甲處士曰吾家幸有秩為長侯及士大夫重然視同甲顧吾家獨富厚安可重累貧者與竟其役伯瞻殊敬羨焉此亦足占其後矣明年九月日將葬鮑陂原新兆秩以其友閭舉人溥狀來請銘溥為予表弟而予嘗因溥以識秩甚厚宜有以銘銘曰汝樸而昌其胤孔良厥宗以光卜此祥岡萬世所藏

張附羽墓志銘

君名附羽字于霄蓋屋人也曾祖曰國子監生成祖曰處士深父曰唐山王教授俊初教授為四川新繁

學官以君與弟附翹皆穎悟強記可讀書舉進士日
日為程課以驗之既數年驗其俱可乃俱遣為蓋屋
學生自歲季科舉諸考凡言蓋屋學生者必曰張氏
附翹附羽云附翹既舉弘治辛酉鄉試君乃益淬勵
及甲子亦舉鄉試可謂竒矣今年九月十四日以傷
寒疾醫終弗瘳乃死京師正陽門外逆旅舍中年三
十又二遺其妻田氏與其幼女三新生子一微附翹
與同在君且何以歸也噫嘻痛哉余正月過內丘時
君自潞州省父教授回余望之視為學生時若變易
遠也乃至是何哉由其議論觀之宜可舉進士即不

舉能逮其通銓籍焉亦可矣居京師兩年士事備而
死也乃皆不然焉豈不深可惜也人有孝者天必培
以享遇之福君事母辛氏雖口食之細亦不忘有所
竒異輒不食必以歸奉焉有疾病時時問慰摩切靡
肯有間斷也何獨不享又并其壽與促之耶豈固其
數或有然耶附翹泣拜告余曰夫子與兄弟俱交且
厚願有以銘之使不朽乃銘曰 人之良藝之工於
是以終有子在抱弟以克恭曷為其窮

甥婦楊氏墓志銘

表甥王德華以嘉靖乙酉冬十月八日喪其新婦葬

後七年辛卯秋七月赴試過武功出其兄舉人德光之狀乞予銘其墓石若曰甥今已娶安定楊氏生男女矣而新婦能孝吾親睦吾姊妹與嫂敬事吾弟不可忘維舅憫新婦之火天亡也庶幾錫以不死之道予覽德光所撰狀心感新婦之賢焉曰嗟乎新婦少女子也而能如是非所稟純粹貞淑要以異諸人者遠矣按狀新婦隴西人祖鐸懷柔知縣父廷濟庚午舉人母李氏早歿育于祖母劉氏年十九歸德華事德華祖母太夫人洎其舅姑皆喜謂其有婦也及太夫人卒新婦哀毀過于所生而處德華姊妹洎嫂略

無爾我至疾病相與扶持久而弗倦是歲疫大作王氏病者相枕藉新婦初視德華妹疫湯藥之供一切親與為之或曰疫染人當避也不聽曰何親如姑嫂者未幾德光妻復病值德光如省治大夫人葬事不在而新婦於凡湯藥之供又一切與為之甚至以口哺藥略不計其傳染也或又有言者曰嫂與姑同兄不在責當在我我與嫂均少失母吾安忍不救嫂相與寢處者幾月餘嫂疫欲間而新婦疫疫浹旬而新婦不起矣若新婦者殆行法俟命者哉德華言新婦事已誦讀燈火必親必躬雖寒暑母間此婦人恒德

予獨傷其視嫂與小姑者千萬人不可強而能也雖其祖母劉教之有素而天資之美要不可誣矣新婦生弘治甲子六月十六日至卒之日享年二十二歲云為之銘曰爾順爾淑天禔孔厚顧爾弗壽予將焉咎銘以告哀賁爾泉臺惟爾休哉

蕭氏妹墓志銘

妹姓閻氏故順天尹馬嵬公鐸孫也馬嵬公娶於先太常公之女是為予太姑生妹父鴻臚公璘而鴻臚公娶太興趙通政伯顯女生妹女兄弟四人趙夫人以妹季且屬愛也於是議婚輒難曰必得當是者斯

可與之舉人蕭竒元者為諸生時以文學獨知名與表弟溥為筆硯友嘗謁趙夫人夫人異之曰此所以同吾子遊者翌日蕭氏議婚來夫人欣然曰我女宜為若婦今便許之及妹歸事舅姑克盡禮孝舅姑甚宜之而汝弼弟妹皆幼妹一切愛厚勞問其弟妹依然若同胞也妹天性慈孝恭惠雖出貴族其循循執禮獨終始毋少替然淑靜寡言笑故能精緻女紅姻鄰見者自以為莫及也曩汝弼向學勤苦罔以寒暑間旦夕妹曰夫能厲志如此我安以簪珥為有所不逮解以資之此少年修飭之人能卓卓若爾雖與鷄

堂山集卷之四十一
鳴所稱何異哉趙夫人卒妹號泣嘔血勸不能止表
弟瀚者妹長兄也妻遺襁褓子女時妹在室恐重遺
趙夫人之憂乃身自撫育皆至成立趙夫人曰兒可
為魯義姑歸必宜人正德乙亥八月戊午卒於產由
生弘治戊申三月癸未則年但二十又八爾生男子
一曰葵兒汝弼將以明年正月乙未葬秦墓先塋之
次以狀來請曰苛元不幸喪此懿配上痛兩親下愴
孤息兄其為銘之銘曰孝不畢生宜不逮亨育不視
成天實為之悲此芳齡

對山集卷之四十二

康對山先生集卷之四十三

墓志

將仕郎泌陽縣主簿張君墓志銘

張君故邠人也諱翔字雲端祖曰張榮富有厚積人
號曰張萬糧父曰張顯能繼其父之業而宏大之娶
趙氏趙氏者戶部侍郎道公倫之女生三子其季者
張君也君初為州學生以家事廢學為布政司知
印仕為廣平臨洺鎮巡檢能過其食當道者累旌賞
之遂陞為泌陽簿簿泌陽數十年則又大有聲譽於民
而君以目疾遂棄泌陽歸二十一年日日與親友置

酒宴會輕財仗義自郡守以下莫不以張君為賢也
正德五年十月十九日卒於子雄開州吏目官舍中
由生正統五年正月十二日享年七十一歲取曹氏
生男子二人長雄初為魚丘驛丞陞開州吏目次守
直州學廩膳生員女子一人為

襄陵王長子夫人孫男子七人大倫大仁大儒皆國
子生大儀大偉大佐大任俱駸駸有為也孫女子五
人皆已嫁聘名姓君又有曾孫子三人堯臣舜臣禹
臣於乎其可以為盛矣明年四月日雄將祔葬州西
祖塋之次因吾友任孝子禮以狀來乞余銘曰此狀

公幕賓閻伯仁讓之狀也伯仁信厚君子當必有徵
張君之德者然君之德厚於身及於子孫其所揚之
於人固無有不盛矣於是為之銘曰

吁嗟張君其古人之遺德耶狀稱其建學臨洛克成
其子弟與能求冉伯牛之墓學士大夫孰能與之先
也在泌陽又克鋤抑豪右剪縛寇賊今之有風力仕
大官者安知非以張君為反手也生子而能賢以養
死以哀生孫而能至於曾此於人何由歟焉此於人
何由歟焉

高年爵者賓党公墓志銘

公諱資壽字祖仁武功人也自先世以來皆富而好禮為郃城大家父整取侯氏生公兄弟二人公嗣整守家人業能克幹厥盡党氏之業弗中衰焉晚年有司請為鄉飲賓年八十奉

詔受高年爵嘉靖丙申正月二十五日辛巳以疾卒於家由生景泰壬申九月四日癸巳享年八十有五配張氏故太原推官張公良佐女也先公二十年卒生男子三人長時精於岐酉道先母九月卒初娶先季父長洲公之女生一女丁嫁學生劉遐齡繼娶華氏生一男子朝著娶劉氏生子思溫及一女子嫁學生

王鑑次昭縣學生取王鴻臚之女生男子朝緒朝儀二人朝緒取孫上舍軒女生二子思聰思恭朝儀縣學生聘予叔弟淳女女子一嫁楊肇東側室楊氏生三子朝服聘郭氏朝冠朝璋孫氏生一子朝圭季曉娶景氏生一子朝紀聘楊氏二女長在室次聘牛上舍夢祥男某女子四人長嫁長垣教諭魏華次嫁楊經次嫁劉臣又次嫁徐仲臣苗裔盛矣今年丁酉十月二十四日庚午昭等將與張合葬以予為銘昭學於予不可辭銘曰

郃原膺膺葬公得所子孫如雲何福不覩伉儷永偕

世萬安土

其節吳先生墓志銘

先生諱傑字文彥武功高望鄉人也曾祖謙祖端父林皆世有隱為鄉善人林配陳氏先生七歲失怙恃撫養於祖祖母王氏獨鍾愛焉先生天性嚴重自不說嬉戲無益之事王於是遣就外傳值季父貞為西安掾又從季父就學西安吏廨季父喜其克勤於學顧以終鮮兄弟為憂勸求為吏以自裕養而先生佛然對曰既學聖人之道乃復利吏耶遂謁巡撫都御史陳公求補縣學諸生陳公可之有檄下府縣由是

與季父失怙歸依於仲父清值祖與祖母繼歿先生以嫡孫承重三年之喪哀痛備至洎除服仲父析居季父上京矣年踰弱冠婚聘尚無惇然一身卒若季父所料不得已苟依舅氏開塾授學而已曰予不得志於世乃亦不得志於學耶且惟數學半雖所以淑人亦所以淑已也曷由是以卒吾之志使吾終其身以誦說聖人之道哉於乎此其志向高遠安可與凡近道也初娶張氏扶風良家子早死葬扶風某里生一女子今為孟泰妻繼娶趙氏有婦德宜於先生先生卒以身教其子辛苦備至無少怨恫鄉鄰以為姆

儀其嚴正恭和卓有孟陶之風生子二世瞻世徵世
瞻弘治甲子舉人知銅梁縣有治轍而二女一嫁劉
文經一嫁李鳳世瞻娶劉氏生子曰棟方肆力於學
女幼世徵娶康氏尚未有出先生生宣德甲寅九月
二十日甲午卒弘治丁巳四月十六日丁亥春秋六
十有四趙生正統己巳五月十八日丁酉卒嘉靖癸
未十月二十八日甲子春秋七十有五今年己酉閏
十二月七日辛酉世瞻奉趙孺人之柩葬長寧北原
新塋從先生之兆而求張孺人之兆無有識者皇皇
然有憂衷焉然無可柰何而已初世瞻與予同為諸

生予獨重之因常拜先生於莊所觀其貌聽其言
抱道長隱者也後予於憲王之歿與友生符珽為詩
以謚先生曰甘節蓋先生身處殊貧而樂道好學死
而不易其平居教人讀書令先熟誦白文然後徐讀
註疏以求其義自然血脉貫通故世瞻文學汪濊為
鄉聞人其家學源流遠矣又嘗哀采歷代國號世系
為四言書以訓童蒙而居常恒以朱子成書真氏讀
書記程復心槩括諸書玩索不輟非所謂篤信好古
者與今歿二十九年予每與人語未嘗不以先生之
行為難而竊慕之蓋先生以嚴自治以誠待人故其

感人之深如此茲世瞻以墓銘乞予義詎可辭於是
銘曰長寧良原其土孔敦其高窪然是為甘節先生
之阡兆與配聯子孫翩翩胡不萬年

處士張公配趙氏合葬墓志銘

公諱鉉字克量咸寧人也先世祖子榮元知耀州進
封三原縣男生子曰伯堅行中書省員外郎員外郎
子潔夫知神木縣生仲益有隱德洪武初以高年直
言數應詔道述民事生順公大父也大父生涇娶王
氏生公兄弟五人而公第四子也天性剛方蠲介雖
從家人業而襟度嚴飭不妄與人交與人交誠信慤

切務自盡心意成化時中淮漕數千皆身往營置靡
有後愆商有曹佐者蘭人也慕悅公之賈道來與公
夥經數年無豪髮相謾佐嘆曰人言義利分明誠唯
克量公足以當之故族人張紳親友李文吉管佩之
輩唯公依焉豈非聞曹佐之言而興起者乎弘治甲
子閏四月二十九日病感寒卒淮安客舍中正德戊
辰扶柩歸寄葬城南草場坡之原由生正統 年月
日享年六十有四配趙氏同郡名族子也父曰世英
有厚德隱於商而趙年十六歸公有婦德治家有法
小與大成宜之生正統某年月日卒嘉靖二年三月

日享年七十有八生男子二人演澄演西安府學生
有瑰才懿行予甚重之與予弟淳河同為正學書院
生徒諸生徒皆尊禮眎之無敢狎也豈非公之遺教
乎哉孫男子三人元朱元杲元相孫女子三人長者
適趙臣克次字李某皆士人季天乙酉三月十三壬
申演遷公柩與趙合葬曲江新阡乃衣衰經徒步來
潁西山房乞予銘公墓石予重哀演之篤孝極思於
是銘曰
享豐而據腴昌胤而昭族生也奚媿歿也允穀
是服

鳳翔處士毅庵毛君墓志銘

毛君之卒也以成化丁酉七月丁卯今蓋四十有幾
年矣正德戊寅十二月戊辰值其繼室王孺人之喪
明年己卯十二月甲申子鸞始啓其故窆遷葬君於
城東南七里三岔柏林凹新兆并其先配王孺人合
葬焉前期鸞以狀來請予為銘君卒時鸞才襁褓也
至是登臚仕為聞人矣於乎君其有以知之乎哉其
無以知之乎哉按狀君諱雄字德嚴別號毅庵上世
故興平人六世祖德仁始移居鳳翔岐陽里高祖文
忠不仕生子綸字大經末樂時歲貢士為廣洋衛經

歷配陳氏生玉字彥和有盛德為鄉人所尊重與弟
斌同居三十年因心之愛終始不渝及分異悉推讓
所有予斌閭里以薛包比之後以齒德推擇尊為鄉
飲大賓知府張公熊公至皆待以殊禮備咨訪焉年
八十三受高年爵配鞏氏生亮字克明克嗣其業至
號純厚配唐氏知眉州蕪之孫也有婦德足以上繼
陳鞏生君及其弟驥與女弟某今丙子舉人李涵母
也乃值亮卒時唐方盛年艾容終身守志歷三十年
人無間言故君生有令德沒有令名者其先人之訓
由來者遠也君兒時即端莊無嬉遊年十三高年公

遣學於致仕訓導張傑傑號有體認之學當時士大
天宗師之稱曰默齋先生君言動性行無戾所教而
天資又穎悟不凡吳先生希之秦先生偉德見之深
所器重十五被選為府學生遭父喪哀毀踰禮葬祭
一無紛華時俗方盛興浮圖法有弗為者或以為棄
親共非笑之高年公家方富盛而克明又愛子也顧
何有弗為者君百方婉詞諫止其哭泣之哀顏色之
戚至於令人猶稱焉已而高年公不歆君仕進乃一
以家事付君君承頽奉志高年公說以為良孫子也
於是以百金命遊江南諸奧區君至江南且賈且學

三四年積千金數十百卷既歸每以太極圖與諸性
理氣數書質疑秦偉德以為能益嘉與之乃更躬自
督責教驥寒暑風雨無少怠至於處宗族接姻鄰恭
而有禮親而有恩孝弟之實信於鄉人為妹擇配深
得婚嫁之體不私貨財不媿妻子表然孝義人也未
幾卒年纔二十又五景泰癸酉四月丙辰其始生日
也嗚呼惜哉君初配王氏郡長者王以良女有容德
娶一年則死乃繼娶郡士王志誠女君卒時王才二
十三歲而鸞尚妊娠君曰妻孝有禮必母肯更事人
可篋吾書俟吾兒長悉以貽兒祖父母皆老可誠孝

善事以終天年此外皆非所托前王氏嫁我未久死
吾甚宜之可語吾兒待渠母百年後收骨同葬也王
泣頷之後王卒以守節為巡按御史秦昂奏旌其門
君卒三十一年正德丁卯鸞舉鄉試高等明年中乙
榜署綿州學正學正三年以撫按累薦擢南充知縣
有令名鸞治家人業號有幹蠱孫男子六人孫女四
人曾孫女子一人其後昌矣銘曰

毛君好德貞以格年齒弗長廿五厄艾妻隆節天所
莫子賢且昌聲允赫揚輝迭耀君豈滅栢林之凹新
爾宅子孫繩繩永言懌

房母太淑人种氏墓志銘

正德癸酉秋八月十一日丙午房母太淑人种氏卒
冬十一月二十日甲申將葬城東之原子陝西都司
都指揮同知懷以舉人王治狀來請銘云懷自曾大
父皆以宦居靖虜靖虜西鄙非所以安靖神魄乃今
俱遷來此原為房氏世堂先君不幸早歿鋒鏑不能
收葬乃獨葬先淑人辛苦備嘗幸育孤等成立榮養
未久亦既殞卒矣此其痛何可言按狀太淑人姓种
氏上世通州人也祖興為陝西寧夏西路左叅將父
泰鞏昌衛指揮使配某氏生太淑人太淑人年十六

歸靖虜衛指揮使房公鑑婦德咸備房氏小大宜之
未幾逆賊滿四反石城指揮公同大軍與戰季父房
琳以力戰死陣中指揮公仰天大呼曰叔父為我死
我獨不能為國死乎時賊勢日銳大軍多退縮不前
公張目奮戰衝勝迎之所擊殺甚衆賊人人駭乃鼓
翼奔公公遂被害當是時公戰益力使有數人翊公
戰賊且破矣賊見公死於是大呼躋我軍而我軍大
潰死者過半積屍若丘山云故竟不得指揮公屍是
時指揮公年纔二十又五也太淑人聞之即震哭數
絕幸母媪解慰不死得撫育孤以有今日二孤者懷

與弟國子生愷也當訃時懷纒三歲愷即四月腹耳於乎艱哉房氏代有高爵鉅官房成者指揮公曾祖也洪武時為寧夏中衛指揮使卒子貴襲調蘭州衛軍政克肅尋陞陝西都司都指揮使掌司事正統二年始建靖虜衛

勅公守備焉故遂居靖虜生子琮早死不得襲娶王氏生指揮公指揮公少小即竒崛有志忠孝本於性成故眊死如歸如此今其子懷又磊磊然不可限量數以才武受

勅守備及掌視司事無忝其先人房氏益赫然名關內矣夫太淑人以名家女弱艾之年乃克當此凶累艱難備嘗非其天性貞淑儉制有素難矣哉其有今日也太淑人卒時年已六十六有孫男子五人鳳鳴鳳喈鳳雛鳳吟鳳翔孫女子七人長嫁西安左衛指揮使王鑑次嫁寧夏衛指揮同知李瀚又次嫁靖虜衛副千戶蔭子劉夔龍又次嫁固原衛都指揮使蔭子王佐又次許西安左衛指揮同知蔭子王謙又次許靖虜衛正千戶蔭子馬世經又次幼未許在室其子孫支蔓可謂盛矣其所受於其夫而行於其身可謂無忝矣銘曰

石城之亂良人以亡旣悴旣竭非予孰臧受契視履
維房是光節苦心厲孫子乃昌東門之兆允厚允陽
生不同室死不同穴人心孔傷

楊母孺人王氏合葬墓志銘

國子生岐山楊价以嘉靖壬辰十月二日丙子喪其
母孺人王氏將以今年甲午冬十二月十日癸卯合
葬於厥考義官翁之窆以狀來請銘曰先義官翁卒
先叔北山翁嘗志其墓矣今先孺人之葬惟舅有以
念之庶銘其墓石俾母之賢得托諸不朽蓋先姊昔
歸北山公而价亦以舅視予故云予聞先姊言王孺

人之賢未嘗不重自嘆息及北山公時道兄嫂之恩
而事王孺人猶母也乃信且敬云按狀王孺人出岐
之名族父曰某為鄉飲賓配某氏生孺人天性柔惠
動有禮法年十九歸義官翁事姑龐夫人及繼姑白
羽二夫人皆極其孝敬先後咸宜焉北山公少有竒
志義官翁猶識之謂王孺人曰昌吾宗者季弟武爾
可善視之蓋是時羽夫人卒北山公方五六歲乳養
撫摩皆王孺人為之後北山公為生員藉有文名值
關中有甲辰之飢人相食北山公自以為為不可支而
義官翁往返蜀道間關數千里負米給之丙午歲豐

始歸曰不畱今日復與弟完聚也又三年弘治己酉
北山公舉鄉試丙辰第進士累官都察院右僉都御
史正德庚午歸休水北山房飲食起居無弗與義官
翁同也予數遊水北聞其言以為楊氏之興雖自北
山而敦仁啓孝義官翁與王孺人之力先焉北山公
深以為然義官翁諱全字宗周享年七十又一王孺
人生正統丁卯二月八日庚子享年八十又六生子
惟价娶李氏生孫男子三長燁生員次燁煉方事於
學燁娶王氏燁娶李氏又有曾孫男一人曰墀曾孫
一人未字昔北山公病予往視之見价之事北公

靡事不盡其心以為子姪之事諸父若价者誠已少
矣未嘗不歎義官翁孝友之德奕世未艾如此王孺
人之銘義安可辭銘曰

翁仁嫗孝煥其有報子孫振振胡德弗耀我銘堅石
來裔永倣

皇明宗室鎮國夫人許氏墓志銘

樂平定肅王第五孫鎮國將軍守德子徵釭有配曰
許夫人蓋安東中護衛義官許翁宣長女也淑慎有
容悅於古訓內外誦之

定肅王聞其賢乃徵配守德鎮國結縭之後孝敬恭

和勤愛備至上下以為難能鎮國出閣後家事漸饒
尋至大有夫人伸縮之力也一時宗室中實鮮其儔
鎮國篤於親故崇於儉素夫人無一事不與之同故
和氣所萃多男而賢有如此嘉靖丙申十二月十有
八日巳巳以疾卒於正寢由生成化壬辰二月十有
八日乙酉春秋蓋六十有五生男子十人潮湏瀆澮
澨沖滌溼灑澱皆受爵輔國將軍瀆澮澨早卒沖奉
叔徵鈞祀唯澱且幼潮善理家有陶朱之風瀆讀書
重義滌溼灑又皆守禮克家鎮國與夫人修身齊家
之效不可誣也女子五人長廣原縣君配儀賓荆芝

次靈寶縣君配儀賓蔡廷芝次新安郡君配儀賓任
賢次膚施郡君配儀賓劉雲次桐栢郡君配儀賓李
行孫男子十四人旭楫旭得俱奉國將軍乞

賜名者七人旭糊旭恭旭柏旭杻旭滕未名者七人
孫女子十二人長祁縣縣君配儀賓高某僉憲某之
孫也次郿縣縣君餘幼在室曾孫女子一人其裔繁
矣借潮等將以嘉靖戊戌九月十有二日壬午葬夫
人於郡南大統山之麓以知州桑君停之狀來請銘
於予予惟我

國家螽斯麟趾之化本支百世愈遠愈盛

聖天子又從而興行振起之有商周之所未逮天下宗室胥如鎮國與夫人之賢真可無愧於關雎葛覃之教矣於戲盛哉銘曰

統山之麓旣歿且靈卜為佳城于萬斯年以薦宗盟

楊母太宜人王氏墓志銘

嘉靖甲午冬十一月三日乙丑楊母太宜人王氏卒於家十二月二十八日庚申其子淳以四川布政使司左布政使奔喪歸過武功予往吊之曰淳不孝聞喪昏迷不能述母潛德為狀請銘於執事歸將謀諸仲父然後以狀上執事幸執事之不棄也敢再拜謝

成予戊辰年承乏校文而布政君則所舉士其居宮守身清慎長厚蕙明果允無忝厥名蓋予所欣羨禮重者也義安可辭按狀太宜人王氏臨潼蕙留里人也父曰會有厚德生女子七人而太宜人長及笄歸封奉政大夫工部郎中楊公某生男子二人長即布政君次瀚

秦府良醫女子一人渭南縣姜繼賢壻也孫男子四人東旦東晨東昇東星而又有曾孫男子二太宜人嗣續繁衍矣封君娶太宜人特方弱冠也上事翁姑曲盡孝敬下理家事具獲伸縮可謂婦人之難能矣

封君好施予延賓友太宜人實順承之及布政君顯
頌太宜人益自簡約以身為訓曰士以名節為先安
貧守分士之炯操顧兒終身勿易厥志茲予能為若
母布政君歷官幾三十年始終清白太宜人之教也
太宜人處妯娌和敬不狎族人有貧乏者凍餒者亟
調恤之咸得無恙卒之日親踈小大莫不躡踊如喪
所生慈厚之德如此布政君之生豈無本哉由生景
泰癸酉五月十八日甲戌年八十有二乙未三月一
日辛酉合葬於封君之兆生榮死哀太宜人備矣銘
曰

懿訓淑德於宗貴只子孫繁昌永錫類只葬合封君
於生遂只比美孟陶婦道備只旂常有稽斯不匱只

壽官楊君墓志銘

君諱企字景瞻扶風岐陽里人也高祖克敬曾祖全
祖能父銘皆鄉里善人銘娶董氏生君君天性甚孝
既壯父命外出為商曰弟在襁褓兒不忍以微利遠
違膝下但居貨于家獲息已倍矣母病焚香籲天願
以身代母果愈曰天監我憫我活我母我何以報天
於是散粟賑飢築橋濟眾或有傾圯終身任之孔廟
神祠聞有脩理皆出金以助孝友慈惠并撫其姪廷

爵姪孫禹佐等娶妻成家鄉人咸以為難知縣楊叔厚殊重其人蓋數與予誦焉敦請為鄉飲賓以風化里俗嘉靖丙申十二月四日以疾卒享年七十有二生男子一廷蘭義官也孫男子二禹臣太學生禹相縣學生曾孫男子三舒艷喬曾孫女子二苗裔盛矣廷蘭將以明年丁酉正月葬君法門鎮東新北以其從弟學生瑞狀來請銘于予君之陰德可以動鬼神者有數事不可無紀以示鄉人廷蘭嘗行商於外兩遇劇盜一錢未損鄰人失火家獨宴然癸巳涇渭水災廷蘭貨船夜泊渭南同維者漂溺不可勝計廷蘭亦獨全安叔厚良吏瑞佳士所語所撰必有足徵銘不可辭銘曰民以襪襖為德若景瞻者非其人邪孝友恭和其指頗近而神理彌欣厥宗奕奕子孫振振後人考德其用諦於斯文

咸寧郭處士墓志銘

處士諱理字宗智咸寧人也曾祖曰郭得成生子道原舉人材為河南府經歷生子恂恂娶李氏生三男子其季者處士也處士穎異負氣然幼有目病不得讀書肆意為家人產即能饒厚有裕無怨恫於父母兄弟性又簡易不與人苟合雖身為布衣非有士君

子之行者弗肯與遊與之遊者皆愛敬若兄故人
嚴憚修飾不肯惡處士也醫有齊惠者喜奕而不理
於業人雖有篤病當奕不肯廢也見處士來即罷奕
應病者病者得惠醫皆生故其病者因其奕皆來趨
處士而惠之醫與處士之方正因泯然徧關中矣又
生不喜酒晚年少飲酒飲則輒醉醉則掀髯微笑而
止人莫能測也終身未嘗一至公門暇日惟焚香默
坐誦道德書及為善陰隲書客至喜問談山川名勝
之跡故天下山川名勝者處士能一一道之人屢薦
處士賓鄉飲堅辭不就正德庚午有

詔給民老壽者冠帶處士時年已八十三竟不受又
二年壬申二月丁丑以病卒由生宣德戊申三月丁
未春秋蓋八十有五配李氏生男子三人鈇錦鏗女
子三人嫁為趙邦式李聚與太學生李選妻孫男子
二人懋栓孫女子五人長者一嫁商南學生李相一
嫁李陽一嫁咸寧縣學生許楊二尚幼鈇錦皆早歿
而鏗舉正德丁卯鄉試將以某月甲子葬處士于鴻
固原新兆乃持表第閭舉人溥狀來請銘予舊聞鏗
才美志量私甚重之因推及其先世而處士之名行
與溥狀有徵遂為之銘曰惟彼郭氏實自號奔于周

為宗乃肇郭孫最隗舟秦根枝孔繁汾陽始華郭世
乃尊及此河間修潔克武令德不輜是生恂父三英
既敷處士克宇彼克云何非幹厥蠱郭德樂文追我
鼻祖子孫振振惟鏗孔新昌宗允始惟郭之珍既珍
我郭心遐弗康卜云鴻固惟公是藏公福孔茂保艾
爾後世萬彌章我銘在右

對山集卷之四十三

